

হজের মাসে ওমরা আদায় প্রসঙ্গ

العمرة في أشهر الحج

< Bengali - بنغالي - বাংলা >



মুহাম্মদ ইবন সালেহ উসাইমীন রহ.

محمد بن صالح العثيمين رحمه الله



অনুবাদক: কামাল উদ্দিন মোল্লা

সম্পাদক: ড. আবু বকর মুহাম্মাদ যাকারিয়া

ترجمة: : كمال الدين ملا

مراجعة: د/ أبو بكر محمد زكريا

হজের মাসে ওমরা আদায় প্রসঙ্গ

প্রশ্ন: কারো পক্ষে হজের মাসসমূহে হজ আদায় না করে শুধু ওমরা আদায় করা বৈধ কি না? যেমন, আমি হজের প্রায় অর্ধমাস পূর্বে মক্কা মুকাররমায় প্রবেশ করে ওমরা আদায় করলাম। এর পর হজ না করেই নিজ দেশে ফিরে আসলাম। আমার জন্য এ কাজটি কতটুকু বৈধ হলো?

উত্তর: আল-হামদুলিল্লাহ

আলেমেদের মাঝে কোনও প্রকার মতপার্থক্য ছাড়াই বলা যায় যে, হজের মাসসমূহে ওমরা আদায় করা জায়েয আছে। চাই এ বছর সে হজের নিয়ত করুক বা না করুক। সর্বাবস্থায় তার ওমরা পালন বৈধ।

রাসূলুল্লাহ সাল্লাল্লাহু আলাইহি ওয়াসাল্লাম তাঁর জীবনে মোট চার বার ওমরা পালন করেছেন। প্রতিবারই তিনি তা জিলকদ মাসেই সম্পাদন করেছেন। আর জিলকদ হজের মাসসমূহেরই একটি মাস। কেননা হজের মাস মোট তিনটি, শাওয়াল, জিলকদ আর জিলহজ। ঐ সময় তিনি শুধু ওমরা করেছেন হজ করেন নি। হ্যাঁ, তিনি তার শেষ ওমরার সময় হজ করেছেন। আর এটিই ছিল তাঁর হজ্জাতুল বিদা বা বিদায়ী হজ।

প্রমাণ: আনাস রাদিয়াল্লাহু আনহু থেকে বর্ণিত, তিনি বলেন,

«أن رسول الله صلى الله عليه وسلم اعتمر أربع عُمر كلهن في ذي القعدة إلا التي مع حجته: عمرة من الحديبية أو زمن الحديبية في ذي القعدة، وعمرة من العام المقبل في ذي القعدة، وعمرة من جُعرانة حيث قسم غنائم حنين في ذي القعدة، وعمرة مع حجته»

“রাসূলুল্লাহ সাল্লাল্লাহু আলাইহি ওয়াসাল্লাম মোট চারটি ওমরা করেছেন, হজের সাথে সম্পাদিত ওমরাটি ছাড়া সবকটি ওমরাই ছিল জিলকদ মাসে। একটি ওমরা ছিল হুদাইবিয়া থেকে প্রত্যাবর্তনের সময় অথবা হুদাইবিয়ার বছর জিলকদে, আরেকটি পরবর্তী বছর জিলকদে, আরেকটি জিয়িররানা থেকে যে বছর তিনি হুদাইনের গণিমত বন্টন করেন সেটিও জিলকদে এবং সর্বশেষ ওমরা ছিল তার হজের সাথে”। (সহীহ বুখারী হাদীস নং ৪১৪৮; সহীহ মুসলিম, হাদীস নং ১২৫৩)

ইমাম নাওয়াবী রহ. হাদীসের ব্যাখ্যায় বলেন, আনাস ও ইবন উমারের বর্ণনায় তাদের উভয়ের ঐকমত্য পরিলক্ষিত হয় যে, রাসূলুল্লাহ সাল্লাল্লাহু আলাইহি ওয়াসাল্লাম চারটি ওমরা পালন করেন, একটি ছিল ৬ষ্ঠ হিজরীর জিলকদ মাসে হুদাইবিয়ার বছর। হুদাইবিয়াতে তাদের বাধা দেওয়া হলে, তারা হালাল হয়ে যায় এবং একে ওমরা হিসেবে গণনা করে। দ্বিতীয়টি ছিল, সপ্তম হিজরীর জিলকদ মাসে তাকে ওমরাতুল কাযা বলা হয়। তৃতীয়টি ছিল, মক্কা বিজয়ের বছর অষ্টম হিজরীর জিলকদে, আর চতুর্থটি ছিল বিদায় হজের সাথে। এ ওমরার ইহরাম ছিল জিলকদে আর বাস্তবায়ন ছিল জিলহজে।

ওলামায়ে কেরাম বলেন, রাসূলুল্লাহ সাল্লাল্লাহু আলাইহি ওয়াসাল্লাম ওমরাগুলো জিলকদে পালন করেন। কারণ, এ মাসের মধ্যে ওমরা পালন করার ফযীলত বেশি। এ ছাড়া তাঁর উদ্দেশ্য ছিল, জাহেলিয়াতের রীতি-নীতির

মোকাবেলা করা। কারণ, মুশরিকরা বিশ্বাস করতো, জিলকদ মাসে ওমরা পালন করা মারাত্মক অন্যায় ও গুরুতর অপরাধ। তাদের এ আকীদাকে বাতিল করার জন্য রাসূলুল্লাহ সাল্লাল্লাহু আলাইহি ওয়াসাল্লাম এ মাসেই একাধিক ওমরা পালন করেন, যাতে এ মাসে ওমরা পালনের বৈধতা সম্পর্কে আর কোনো সংশয় না থাকে এবং জাহেলিয়াতের ভুল ধারণা চিরতরে খতম হয়ে যায়।

সমাপ্ত

